

Date – 07/05/2026

Time - 7:30 -7:40 Hrs
AKASHVANI AIZAWL

REGIONAL NEWS BULLETIN

HEADLINES (MORNING)

1. All India Radio kum 90 tlin lawmna pualin naktuk zingkarah AIR Aizawl chuan Walkathon a huaihawt dawn a, AIR Station Tuikhuahtlang atanga Millennium Centre thleng ke a kal a ni ang.
2. Home Minister Pu K.Sapdanga chuan Police tan Discipline chu duhthlanna a ni lo a, an inngahna lungphum a ni a ti.
3. ICT Minister Dr Vanlalhlana'n IT hmasawna avangin mipui ten awlsam zawkin tui, kawlpheha leh phone hman man an pe thei tih a sawi.
4. President Droupadi Murmu chuan Vietnam President To Lam chu Rashtrapati Bhavan ah kawmin ram pahnih thawh dunna tur hrang hrang an sawi dun.

<><><>

AIR 90 YEARS WALKATHON

All India Radio kum 90 tlin lawmna pualin naktuk zingkarah AIR Aizawl chuan Walkathon a huaihawt dawn a, AIR Station Tuikhuahtlang atanga Millennium Centre thleng ke a kal a ni ang.

All India Radio kum 90 tlin lawmna pual hian AIR Aizawl chuan hun pawimawh hrang hrang buatsaih a khuh hawn nan Lamp Lighting bakah 90 Years Musical Concert te a buatsaih a, Walkathon hi Aizawl mai nilo District dangah pawh buatsaih ani dawn a ni.

All India Radio Aizawl Director leh Mizoram Cluster Head Pu DR Lalropuia chuan AIR Aizawl in Walkathon buatsaih tur chu All India Radio kum 90 tlin lawmna pual anih thu sawiin AIR Aizawl-a thawk mek leh thawh tawh zawng zawngte tel vek turin a sawm a ni.

All India Radio hi June 8, 1936-ah din niin, New Delhi-ah Headquarters a awm a; AIR Aizawl hi India ram puma AIR Station 230 zinga pakhat niin, AIR kum 90 tlin pual hian AIR Aizawl chuan a lawmnapui ber hi June ni 8, 2026 khian Vanapa Hall-ah Chief Minister Pu Lalduhoma hovin an hmang dawn a ni.

<><><>

GOVERNOR

Larsap, General (Retd) Vijay Kumar Singh an nimin khan langin Serchhip District a tlawh a. Larsap hian Sainik School Chhingchhip, 14 Assam Rifles Serchhip leh Shalom Special School, Serchhip te tlawhin zirlai, zirtirtu, ex-servicemen leh sipaite kawmin hun a hmang a ni.

Sainik School Chhingchhipah hian zirtirtu, staff leh zirlaite fuihna thu sawiin, Sainik School Chhingchhip atanga zir chhuak zirlai pahnih ten National Defence Academy (NDA) a lut thei tura exam an paltlang chu lawmawm a tih thu sawiin

Sainik School chu mi tha leh danglam bik chher chhuahna tur hmun a ni a ti a, Armed Force-ah lut vek lo mahse, an kalna zawn theuhah chhawr tlak leh danglamna thlentu nih tum turin a fuih a. Ramin thalai nakin lawka hruaitu tha ni tur a mamawh tih sawiin, zirlaite chu danglam bik nih tum tur leh sang tak thlen tum turte, inthununna tha nei tur leh hlawhtlinna chang thei tura inpekna nunpui tlat turte, khawtlang leh ram tana chhawrnahawm tak nih tum turte in a chah a ni.

Nimin vek khan Larsap chuan 14 Assam Rifles Headquarters, P&E Veng, Serchhip chu tlawhin, Commandant Col. Archit Goswami, SM chuan an hmalak dan a hrilhfiyah a. Ex-Servicemen member, Govt. Serchhip College zirlai leh sipaite a kawm a. Zirlaite chu ruihhlo leh a kaihnawih laka fihlim tum tur leh eng hna pawh thawk se, rinawm leh taima taka thawk turin a chah a ni.

Hemi hnu hian Shalom Special School, New Serchhip tlawhin board member leh zirlaite a kawm bakah ei leh in tur a ken sakte a hlan a. Shalom Special School tana a thawh hlawk em avangin Larsap hi chawimawina thuziak cheimawi an hlan nghal bawk.

<><><>

HOME MINISTER

Home Minister Pu K.Sapdanga chuan Police tan Discipline chu duhthlanna a ni lo a, an inngahna lungphum a ni a ti.

Nimina Mizoram Police ten PHQ Khatla GS Arya Mess-ah kumin 2026-2027 ‘Year of Discipline’ hawanna inkhawm an neih a hmanpuinnaah he thu hi sawiin Pu K.Sapdanga chuan Mipui rorelna, Democracy laimu chu, mipui leh Sorkar inkara inrin ngamna a ni tih sawiin, mipui rinna chu amaha lo awm a ni lo a, nitin hlawhchhuah ngai a ni a ti a. Mizoram ralmuanna chu ngaia neih awl tak a nih avangin, Mizoram police te chu inthlahdah phah nan hmang lo turin a chah a, Police tan chuan inthlahdahna chu an hmelma lian ber a ni tih sawiin, Police tha tehna chu hmun ralmuanga an chet dan ni lovin, harsatna a lo thlen thulha a inralrin danah a inngat tel a, Police tha chu hun ralmuangah inthununna tha nen a inbuatsaih reng a tul tih a sawi a ni.

Home Minister chuan Mizoram inchhuanna, State ralmuang nihna chu Police Standard tihnamtu ni lovin, inbuatsaihna hun tha petu ni reng rawh se a duh thu a sawi a, chhun leh zan emaw, hun pui lai a ni emaw, harsatna leh chhiatna a thlenna hmun thlengin, tihphung tha leh inpuahchahna tha nen Mizoram Police chu an inralring reng tur a ni a ti.

Kumina Mizoram Police thupui- in thununna, Discipline chu rawng an bawl sak mipuite hmuh theih turin Police te chezia, thusawi leh thutlukna siamah te a langchhuak tur a ni tih sawiin, Outpost kilkhawr ber atanga Aizawl khawpui lun lai ber thlengin Police te inthununna leh invawna chu a lang tur a ni a ti a. Year of Discipline chu mipuiin Mizoram Police chungarinna an nghah ngam lehzualna tur rahbi pawimawh tak a nih a rin ngheh tlat thu sawiin, a hawng a ni.

<><><>

JJM 2.0 MOU

Mizoram sawrkar leh Ministry of Jal Shakti, Dept of Drinking Water & Sanitation te chuan JJM 2.0 kalpuina turin inremna an ziaak.

Mizoram sorkar leh sorkar laipui Ministry of Jal Shakti, Department of Drinking Water & Sanitation inremna ziah hi Delhi atangin Union Minister of Jal Shakti Pu CR Paatil chuan online-in a telpui a. Chief Minister Pu Lalduhoma leh PHE Minister Prof. Lalnilawma ten Aizawl atangin online-in an zawm bawk.

New Delhi-ah hian Secy Pi Zodingpuii chuan Mizoram sorkar aiawhin MoU hi a ziaak a. Department of Drinking Water & Sanitation, aiawhin Pi Swati Meena Naik, Joint Secretary chuan hming a ziaak a ni.

Video kaltlanga thusawiin Chief Minister chuan, Mizoram chu India rama JJM zaa za tihlawhtling hmasa ber state zinga mi niin chhungkaw nuai 1 sing 3 & 3060 te chu tui herh haw theiin an siam a, Thingtlanga school leh Anganwadi Centre zawng zawngte Functional Tap Water Connection an pe vek tih a sawi.

Chief Minister chuan JJM 2.0 chu nasa takin an tangkaipui dawn a ti a, Viksit Bharat tihlawhtlinna pawimawh tak a ni dawn tih a sawi bawk.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

ICT AWARD

ICT Minister Dr Vanlalhlana'n IT hmasawna avangin mipui ten awlsam zawkin tui, kawlpheha leh phone hman man an pe thei tih a sawi.

Taxation Auditorium, MINECO-ah nimin khan Mizoram sawrkar hnuai Department hrang hrang leh zirna in te tana buatsaih "Government Online Excellence Awards, 2025" sem a ni a. Khuallian Dr. Vanlalhlana chuan, IT hmasawna avanga mipuiin awlsam zawka tui, electric leh phone bill te an pek theih tawh thu sawiin, mipuite awlsamna tura online service pek chhuah kawngah an huang zauh zel turin kalkhawmte a chah a ni. ICT hmalaknain Mizoramah Artificial Intelligence Center of Excellence din tura proposal siam a nih tawh thu leh District zawng zawnga Mobile/Internet connectivity tha a awm theih nan Mizoram Fibre Grid Network thawh mek a nih thu Minister chuan a sawi bawk.

<><><>

SPEAKER

Speaker Pu Lalbiakzama'n ram leh hnam hmasawn tur chuan a chhunga chengte hriselna dinhmun a tha tur a ni a ti.

Nimina Kulikawn, Aizawl-a Agilus Diagnostics laboratory thar a hawnaah he thu hi sawiin, Speaker Pu Lalbiakzama chuan mahni hriselna dinhmun hriat a, enkawlina tha dawn thuai chu sum tam tak sen ralna laka vengtu a ni a ti a. Mizorama diagnostic network awm te chu mipuiten an hriselna dinhmun an hriat zung zung theihna tura hman tangkai ni se a ti a ni.

<><><>

PRESIDENT WITH TO LAM

President Droupadi Murmu chuan Vietnam President To Lam chu Rashtrapati Bhavan ah kawmin ram pahnih thawh dunna tur hrang hrang an sawi dun.

President chuan India leh Vietnam thawhdunna hrang hrang te chuan ram pahnihte chakna a pek mai bakah an bial chhungah remna leh muanna a thlen tur thu a sawi.

President chuan tun hnaiah India leh Vietnam inkara inlaichinna chu a that thu sawiin, defence leh security lama thawhhona, hmasawanna lama thawhhona, leh sumdawanna, hriselna, science & technology, leh tourism ang chi sector hrang hrangah a zau chho zel a ni a ti a. Vietnam President in alo tlawh chhunga inremna thuthlung hrang hrang ziah theih a nit e chu lawmawm a tih thu a sawi bawk.

Hruaitu pahnihte hian India leh VietNam te thawhhona tha tak chuan ram pahnih mipuite tan hlawkna nasa tak a thlen dawn thu sawi a. President chuan President To Lam kaihhruaina hnuaiah India leh Vietnam inlaichinna chu a nghet lehzual dawn niin a sawi bawk a ni.

